

यूहन्ना की पहल्ली चिट्ठी

1 ओ सृष्टि की सरूआत तै ए था: हमनै इस ताहीं सुण्या सै, आपणी आंखां तै देख्या, ध्यान तै निहारया, अर इस ताहीं खुद अपने ए हाथां तै हमनै छुआ सै। हम उस बचन के बाबत म्ह बताण लागरे सां जो जीवन सै। **2**उस्से जीवन का ज्ञान म्हारै ताहीं कराया गया। हमनै उस ताहीं देख्या। हम उसके गवाह सां अर इब हम थम लोग्गां ताहीं उस्से अनन्त जीवन की उद्धोषणा करण लागरे सां जो पिता कै गेल्या था अर म्हारै ताहीं जिसका बोध कराया गया। **3**हमनै उस ताहीं देख्या अर सुण्या सै। इब थारै ताहीं भी उस्से का उपदेश देण लागरे सां ताके थम भी म्हारै गेल्या सहभागिता राखो। म्हारी या सहभागिता परम पिता अर उसके बेट्टे यीशु मसीह कै गेल्या सै। **4**इन बात्तां नै थारै ताहीं इस करकै लिक्खण लागरे सां के म्हारा आनन्द जमा पूरा हो जावै।

पणमेसर म्हारे पापां नै माफ़ करै सै

5हमनै यीशु मसीह तै जो सुसमाचार सुण्या सै, ओ यो सै अर इस ताहीं ए थारै ताहीं सुनाण लागरे सां: पणमेसर चाँदणा सै अर उसम्ह माड़ी-सी भी अन्धकार नीं सै। **6**जै हम कहवां के हम उसके साइझी सां अर पाप के अन्धकार तै भरे जीवन नै जिन्दे रहवां तो हम झूठ बोल्लण लागरे सां अर सत्य का अनुसरण कोनी करण लागरे सां। **7**किन्तु जै हम इब चाँदणे म्ह आगै बढ़ां सां क्यूँके चाँदणे म्ह ए पणमेसर सै तो हम बिश्वासी कै रूप म्ह एक दुसरे के सहभागी सां, अर पणमेसर के बेट्टे यीशु का लहू हमनै सारे पापां तै शुद्ध कर देवै सै।

8जै हम कहवां सां के म्हारै म्ह कोए पाप कोनी सै तो हम खुद अपने आप ताहीं छलण लागरे सां अर म्हारै म्ह सच्चवाई कोनी सां। **9**जै हम अपने पापां नै मान्नां सां तो म्हारे पापां नै माफ़ करण के खात्तर पणमेसर बिश्वास जोग्गा सै अर न्याय तै भरया सै अर समुचित सै। तथा ओ सारे पापां तै म्हारै ताहीं शुद्ध करै सै। **10**जै हम कहवां सां के हमनै कोए पाप कोनी करया तो हम पणमेसर नै झूठा बणावां सां अर उसका बचन म्हारै म्ह नीं सै।

यीशु म्हारा सहारा देणीया सै

2 मेरे प्यारे बेट्टे-बेट्टीयो, ये बात मैं थारै ताहीं इस करकै लिक्खण लागरया सूं के थम पाप मतना करो। किन्तु जै कोए पाप करै सै तो पणमेसर कै श्यामी म्हारे पापां का बचाव करण आळा एक सै अर ओ सै धर्मी यीशु मसीह। **2**ओ एक बलिदान सै जो म्हारे पापां का हरण करै सै ना सिर्फ म्हारे पापां का बल्के साबते संसार के पापां का।

3जै हम पणमेसर के आदेशां का पालन करां सां तो योए ओ राह सै जिसतै हम पक्का करां सां के हमनै साच्चए उस ताहीं जान लिया सै। **4**जै कोए कहवै सै के, “मैं पणमेसर नै जाणु सूं!” अर उसकी आज्ञायां का पालन कोनी करदा तो ओ झूठा सै। उसके मन म्ह सत्य कोनी सै। **5**किन्तु जै कोए पणमेसर के उपदेश का पालन करै सै तो उसम्ह पणमेसर के प्रेम नै भरपूरी पा ली सै। योए ओ राह सै जिसतै हमनै पक्का यकीन होवै सै के हम पणमेसर म्ह स्थित सां: **6**जो न्यू कहवै सै के ओ पणमेसर म्ह स्थित सै, उस ताहीं यीशु कै जिसा जीवन जीणा चाहिये।

सारया तै प्रेम करो

7हे प्यारे ढब्बीयो, मैं थारै ताहीं कोए नयी आज्ञा कोनी लिक्खण लागरया सूं बल्के या एक पुराणी आज्ञा सै, जो थारै ताहीं सरूआत म्ह ए दे दी गयी थी। या पुराणी आज्ञा ओ सुथरा संदेस सै जिस ताहीं थम सुण चुके सो। **8**मैं थारै ताहीं एक और दूसरी नयी आज्ञा लिक्खण लागरया सूं। इस तथ्य का सत्य मसीह के जीवन म्ह अर थारे जीवनां म्ह उजागर होया सै क्यूँके अन्धकार खत्म होण लागरया सै अर सच्चा चाँदणा तो चमकण ए लागरया सै।

9जो कहवै सै, ओ चाँदणे म्ह स्थित सै अर फेर भी अपने भाई तै नफरत करै सै, तो ओ इब लग अन्धकार म्ह बण्या होया सै। **10**जो अपने भाई नै प्रेम करै सै, चाँदणे म्ह स्थित रहवै सै। उसके जीवन म्ह इसा कीमे भी कोनी सै जिसतै कोए पाप म्ह ना पड़ै। **11**किन्तु जो अपने भाई तै घृणा करै सै, अँधेरे म्ह सै। ओ अन्धकार तै भरया जीवन जीण लागरया सै। ओ कोनी

जाणदा, ओ कितोड जाण लागरया सै। क्यूँके अँधेरे नै उस ताहीं आन्धा बना दिया सै।

- 12 हे प्यारे बाळको, मैं थारै ताहीं इस करकै लिक्खण लागरया सूँ, क्यूँके यीशु मसीह के कारण थारे पाप माफ़ करे गये सैं।
- 13 हे पिताओं, मैं थारै ताहीं इस करकै लिक्खण लागरया सूँ, क्यूँके थम, जो पुराणे बख्त तै स्थित सै उस ताहीं जाणो सो। हे युवकों, मैं थमनै ज्यातै लिक्खण लागरया सूँ, क्यूँके थमनै उस दुष्ट पै जीत पा ली सै।
- 14 हे बाळको, मैं थमनै लिक्खण लागरया सूँ, क्यूँके थम पिता ताहीं पिछाण चुके सो। हे पिताओं, मैं थमनै लिक्खण लागरया सूँ, क्यूँके थम जो सृष्टि के पूराणे बख्त तै स्थित सै, उसनै जाण गे सो। हे नौजवानों, मैं थमनै लिक्खण लागरया सूँ, क्यूँके थम ठाड्डे सो, पणमेसर का बचन थारै भीतर बसै सै अर थमनै उस दुष्ट आत्मा पै जीत पा ली सै।

15 संसार नै अथवा सांसारिक चिज्जां नै प्रेम मतना करदे रहो। जै कोए इस संसार तै प्रेम राखवै सै तो उसके हृदय म्ह पणमेसर के बाबत प्रेम कोनी सै। 16 क्यूँके इस संसार की हरेक चीज, जो थारे पाप तै भरे सुभाव नै लुभावै सै, थारी आँखां नै भावै सै अर इस संसार की हरेक वा चीज, जिस पै लोग इतना घमण्ड करै सैं। परम पिता की ओड़ तै नीं सै बल्के ओ तो सांसारिक सै। 17 यो संसार आपणी लालसायां अर इच्छायां सुदा खत्म होन्दा जाण लागरया सै किन्तु ओ जो पणमेसर की इच्छा का पालन करै सै, अमर हो जावै सै।

मसीह के बिरोधियाँ का अनुसरण मतना करो

18 हे प्यारे बाळकों, आखरी घड़ी आण पहोच्ची सै! अर जिसा के थमनै सुण्या सै के मसीह का बिरोधी आण लागरया सै। इस करकै इब घणए मसीह-बिरोधी प्रगत हो गे सैं। इस्से तै हम जाणां सां के आखरी घड़ी आण पहोच्ची सै। 19 मसीह के बिरोधी म्हारै ए भीतर तै लिक्कड़ै सैं पर असलियत म्ह वे म्हारै कोनी सैं क्यूँके जै वे साच्चए म्हारे होंदे तो म्हारै गेल्या ए रहन्दे। किन्तु वे म्हारै ताहीं छोड़ गे ताके वे न्यू दिखा सकै के उनम्ह तै कोए भी असलियत म्ह म्हारा कोनी सै।

20 किन्तु थारा तो उस परम पवित्र नै आत्मा के जरिये अभिषेक कराया सै। इस करकै थम सारे सत्य नै जाणो सो। 21 मन्नै थारै ताहीं इस करकै कोनी लिख्या सै के थम सत्य नै कोनी जाणो सो? बल्के थम तो उस ताहीं जाणो सो अर इस करकै भी के सत्य तै कोए झूठ कोनी लिक्कड़दा।

22 किन्तु जो न्यू कहवै सै के यीशु मसीह नीं सै, ओ झूठा सै। इसा माणस मसीह दुश्मन सै। ओ तो पिता अर बेट्टे दोन्नुआं नै नकारै सै। 23 ओ जो बेट्टे नै नकारै सै, उसके धारै पिता भी कोनी सै किन्तु जो बेट्टे नै मान्ने सै, ओ पिता नै भी मान्ने सै।

24 जड़ै लग थारी बात सै, थमनै पुराणे बख्त तै जो सुण्या सै, उसनै अपणे भीतर बनाए राखवो। जो थमनै पुराणे बख्त तै सुण्या सै, जै थारै म्ह बण्या रहवै सै तो थम बेट्टे अर पिता दोन्नुआं म्ह स्थित रहोगे। 25 उसनै म्हारै ताहीं अनंत जीवन देण का बचन दिया सै।

26 मैं ये बात थारै ताहीं उन लोगां के सम्बन्ध म्ह लिक्खण लागरया सूँ, जो थारै ताहीं छलण की कोसिस करण लागरे सैं। 27 किन्तु जड़ै लग थारी बात सै, थारै म्ह तो उस परम पवित्र तै मिल्या होड़ अभिषेक इब हाल म्ह सै, इस करकै थारै ताहीं तो जरूत ए नीं सै के कोए थारै ताहीं उपदेश दे, बल्के थारै ताहीं तो ओ आत्मा जिसतै उस परम पवित्र नै थारा अभिषेक करया सै, थारै ताहीं सब कीमे सिखावै सै। (अर याद राखवो, ओए सत्य सै, ओ झूठ नीं सै।) उसनै थारै ताहीं जिसा सिखाया सै, थम मसीह म्ह उस्से तरियां ए बणे रहो।

28 इस खात्तर प्यारे बाळको, उस्से म्ह बणे रहो ताके जिब म्हारै ताहीं उसका ज्ञान हो तो हम आत्मबिश्वास पा सकां। अर उसके दुबारा आगमन के बख्त म्हारै ताहीं सर्मिन्दा ना होणा पड़ै। 29 जै थम न्यू जाणो सो के ओ नेक सै तो थम न्यू भी जाण ल्यो के ओ जो धार्मिकता पै चाल्लै सै, पणमेसर की ए ऊलाद सै।

हम पणमेसर की ऊलाद सां

31 बिचार के देखवो के परम पिता नै म्हारै पै कितना महान प्रेम दिखाया सै! ताके हम उसके बेट्टे-बेट्टी कुह्ला सकां अर असलियत म्ह वे हम ए सां। इस करकै संसार म्हारै ताहीं कोनी पिछाणै क्यूँके ओ मसीह नै कोनी पिछाणदा। 2 हे प्यारे ढब्बीयां, इब हम पणमेसर की ऊलाद सां किन्तु आण आळे बख्त म्ह हम के करांगे, इब्बे लग इसका बोध कोनी

कराया गया है। जो भी हो, हम न्यू जाणां सां के मसीह के दुबारे प्रगट होण पै हम उस्से के बरगे हो जावांगे क्यूँके ओ जिसा है, हम उस ताहीं ठीक उस्से तरियां ए देखवांगे। **3**हरेक कोए जो उस पै इसी आस राखै है, ओ अपने आप नै उस्से तरियां ए पवित्र करै है जिस तरियां मसीह पवित्र है।

4जो कोए पाप करै है, ओ पणमेसर के नियम नै तोड़ै है क्यूँके नियम का तोड़णा ए पाप है। **5**थम तो जाणो ए सो के मसीह लोगां के पापां नै हरण के खात्तर ए प्रगट होया अर यो भी, के उसमह कोए पाप नीं है। **6**जो कोए मसीह म्ह बणया रहवै है, पाप कोनी करदा रहन्दा अर हरेक कोए जो पाप करदा रहवै है उसनै ना तो उसके दर्शन करे सैं अर ना ए कदे भी उस ताहीं जाणया है।

7हे प्यारे बाळको, थम किते छले ना जाओ। ओ जो धर्म तै आचरण करदा रहवै है, धर्मी है। ठीक उस्से तरियां ए जिस तरियां मसीह धर्मी है। **8**ओ जो पाप करदा ए रहवै है, शैतान का है क्यूँके शैतान पुराणे बख्त तै पाप करदा चल्या आण लागरया है। इस करके पणमेसर का बेट्टा प्रगट होया के ओ शैतान के काम नै नास कर दे।

9जो पणमेसर की ऊलाद बण गया, पाप कोनी करदा रहन्दा, क्यूँके उसका बीज तो उस्से म्ह रहवै है। इस तरियां तै ओ पाप करदा कोनी रह सकदा क्यूँके ओ पणमेसर की ऊलाद बण लिया है। **10**पणमेसर की ऊलाद कौण है? अर शैतान के बाळक कौण से सैं? थम उन ताहीं इस ढाळ जाण सको सो: हरेक ओ मसीह जो धर्म पै कोनी चाल्दा अर अपने भाई नै प्रेम कोनी करदा, पणमेसर का नीं है।

आप्पस म्ह प्रेम तै रहो

11यो उपदेश थमनै सरू तै ए सुण्या है के हमनै आप्पस म्ह प्रेम राखणा चाहिये। **12**हमनै कैन कै जिसा नीं बनणा चाहिये जो उस भूंडी ओपरी आत्मा तै सम्बन्धित था अर जिसनै अपने भाई का खून कर दिया था। उसनै अपने भाई ताहीं भला क्यातै मार दिया? उसनै इस करके इसा करया के उसके कर्म भूंडे थे जिबके उसके भाई के कर्म धार्मिकता के।

13हे भाइयो, जै संसार थारै तै नफरत मान्ने है, तो अचम्भा मतना मान्नु। **14**हमनै बेरा है के हम मौत तै पार होके जीवन म्ह आण पहोच्चे सां क्यूँके हम अपने बन्धुआं तै प्रेम करां सां। जो प्रेम नीं करदा, ओ मौत म्ह स्थित है। **15**हरेक माणस जो अपने भाई तै नफरत मान्ने है, हत्यारा है अर थम तो

जाणो ए सो के कोए हत्यारा आपणी सम्पति के रूप म्ह अनंत जीवन नै कोनी राख्दा।

16मसीह नै म्हारै खात्तर आपणा जीवन त्याग दिया। इस्से तै हम जाणां सां के प्रेम के है? हमनै भी अपने भाइयां के खात्तर अपने प्राण न्यौछावर कर देणे चाहिये। **17**इस तरियां तै जिसके धारे संसार आळी सम्पति है, अर जो अपने भाई नै घटी म्ह देखके भी उस पै दया कोनी करदा, उसमह पणमेसर का प्रेम है-यो किस तरियां कहा जा सके है? **18**हे प्यारे बाळकों, म्हारा प्रेम सिर्फ शब्दां लग ए सीमित नीं रहणा चाहिये बल्के ओ कर्म म्ह भी हो अर साच्चा होणा चाहिये।

19इस्से तै हम जाण ल्यांगे के हम सत्य के सां अर पणमेसर के आगै अपने हृदयां नै आश्वस्त कर सकांगे। **20**भूंडे काम्मां के खात्तर म्हारा मन जिब भी म्हारै बाबत नाटै है तो न्यू ज्यांतै होवै है के पणमेसर म्हारे मनां तै बड्डा है अर ओ सब कीमे ताहीं जाणै है।

21हे प्यारे बाळकों, जै कोए भूंडा काम करदे बख्त म्हारा मन म्हारै ताहीं कसूरवार ठहरावै तो पणमेसर के श्यामी म्हारै म्ह बिश्वास बणया रहवै है। **22**अर जो कीमे हम उसतै माँगां सां, उसनै पावां सां। क्यूँके हम उसके आदेशां पै चाल्लण लागरे सां अर उन्ने बात्तां नै करण लागरे सां, जो उसनै भावै सैं। **23**उसका आदेश है: हम उसके बेट्टे यीशु मसीह के नाम म्ह बिश्वास राख्वां तथा जिसा के उसनै म्हारै ताहीं आदेश दिया है हम एक दुसरे तै प्रेम करां। **24**जो उसके आदेशां का पालन करै है ओ उस्से म्ह बणया रहवै है। अर उसमह पणमेसर का बास है। इस ढाळ, उस आत्मा के जरिये जिस ताहीं पणमेसर नै म्हारै ताहीं दिया है, हम न्यू जाणां सां के म्हारै भीत्तर पणमेसर बसे है।

झूठे उपदेशकां तै चौकन्ने रहो

4 **1**हे प्यारे ढब्बीयो, हरेक आत्मा का बिश्वास मतना करो बल्के सारीहाण उन ताहीं परख के देखो के वे, के पणमेसर के सैं? न्यू में थारै तै ज्यांतै कहण लागरया सूं क्यूँके भोत से झूठे नबी संसार म्ह फैल्ले होइ सैं। **2**पणमेसर की आत्मा ताहीं थम इस तरियां तै पिछाण सको सो: हर वा आत्मा जो न्यू मान्ने है के, “यीशु मसीह माणस के रूप म्ह धरती पै आया है।” ओ पणमेसर की ओइ तै है। **3**अर हर वा आत्मा जो यीशु नै कोनी मान्दी, पणमेसर की ओइ तै नीं है। इसा माणस तो मसीह का दुश्मन है, जिसके बाबत म्ह

थमनै सुणया सै के ओ आण लागरया सै, बल्के इब तो ओ इस संसार म्ह ए सै।

4हे प्यारे बाळकों, थम पणमेसर के सो। इस करकै थमनै मसीह के दुश्मनां पै जीत पा ली सै। क्यूँके ओ पणमेसर जो थारै म्ह सै, संसार म्ह रहण आळे शैतान तै महान सै। 5वे मसीह बिरोधी लोग सांसारिक सै। इस करकै वे जो कीमे बोल्लै सैं, ओ सांसारिक सै अर संसार ए उनकी सुणै सै। 6किन्तु हम पणमेसर के सां इस करकै जो पणमेसर नै जाणै सै, म्हारी सुणै सै। किन्तु जो पणमेसर का नीं सै, म्हारी कोनी सुणदा। इस ढाळ तै हम सत्य की आत्मा ताहीं अर लोगां ताहीं भटकाण आळी आत्मा नै पिछाण सकां सां।

प्रेम पणमेसर तै मिलै सै

7हे प्यारे ढब्बीयों, हम आप्पस म्ह प्रेम करां। क्यूँके प्रेम पणमेसर तै मिलै सै अर हरेक कोए जो प्रेम करै सै, ओ पणमेसर की ऊलाद बण गया सै अर पणमेसर नै जाणै सै। 8ओ जो प्रेम कोनी करै सै, पणमेसर नै कोनी जाण पाया सै। क्यूँके पणमेसर ए प्रेम सै। 9पणमेसर नै आपणा प्रेम इस ढाळ दिखाया सै: उसनै अपणे ऐकले बेट्टे ताहीं इस संसार म्ह भेज्या जिसतै के हम उसकै बेट्टे के जरिये जीवन पा सकां। 10साच्चा प्रेम इसम्ह कोनी सै के हमनै पणमेसर तै प्रेम करया सै, बल्के इसम्ह सै के एक इसे बलिदान के रूप म्ह जो म्हारे पापां नै धारण कर लेवै सै, उसनै अपणे बेट्टे ताहीं भेज कै म्हारै बाबत आपणा प्रेम दिखाया सै।

11हे प्यारे ढब्बीयों, जै पणमेसर नै इस ढाळ म्हारै पै आपणा प्रेम दिखाया सै तो हमनै भी एक दुसरे तै प्रेम करणा चाहिये। 12पणमेसर ताहीं कद्दे भी किसे नै कोनी देख्या सै किन्तु जै हम आप्पस म्ह प्रेम करां सां तो पणमेसर म्हारै म्ह बसै सै अर उसका प्रेम म्हारै भीतर सम्पूर्ण हो जावै सै।

13इस ढाळ हम जाण सकां सां के हम पणमेसर म्ह ए बसां सां अर ओ म्हारै भीतर रहवै सै। क्यूँके उसनै आपणी आत्मा का कीमे हिस्सा म्हारै ताहीं दिया सै। 14इस ताहीं हमनै देख्या सै अर हम इसके गवाह सां के परम पिता नै जगत के उद्धार कर्ता के रूप म्ह अपणे बेट्टे ताहीं भेज्या सै। 15जै कोए न्यू मान्ने सै के, “यीशु पणमेसर का बेट्टा सै, “तो पणमेसर उसम्ह बसै सै अर ओ पणमेसर म्ह रहण लागै सै। 16इस करकै हम जाणां सां के हमनै आपणा बिश्वास उस प्रेम पै टिकाया सै जो पणमेसर म्ह म्हारै खातर सै।

पणमेसर प्रेम सै अर जो प्रेम म्ह स्थित रहवै सै, ओ

पणमेसर म्ह स्थित रहवै सै अर पणमेसर उसम्ह स्थित रहवै सै। 17म्हारै बाबत म्ह इससे रूप म्ह प्रेम सिद्ध होया सै ताके न्याय कै दिन म्हारै म्ह बिश्वास बणया रहवै। म्हारा यो बिश्वास इस करकै बणया होया सै के हम इस जगत म्ह जो जीवन जीण लागरे सां, ओ मसीह के जीवन जिसा सै। 18प्रेम म्ह कोए भय कोनी होन्दा बल्के सम्पूर्ण प्रेम तो भय नै भजा देवै सै। भय का सम्बन्ध तो दण्ड तै सै। इस तरियां तै जिसम्ह भय सै, उसके प्रेम ताहीं इब्बे भरपूरी कोनी मिली सै।

19हम प्रेम करां सां क्यूँके पहल्या पणमेसर नै म्हारै तै प्रेम करया सै। 20जै कोए कहवै सै, “मैं पणमेसर नै प्रेम करूँ सूँ” अर अपणे भाई तै नफरत मान्ने सै तो ओ झूठा सै। क्यूँके अपणे उस भाई ताहीं, जिस ताहीं उसनै देख्या सै, जिब लग ओ प्रेम नीं करदा, तो पणमेसर नै जिस ताहीं उसनै देख्या ए नीं सै, ओ प्रेम कोनी कर सकदा। 21मसीह तै म्हारै ताहीं यो आदेश मिल्या सै। ओ जो पणमेसर नै प्रेम करै सै, उस ताहीं अपणे भाई तै भी प्रेम करणा चाहिये।

पणमेसर की ऊलाद संसार पै जीत होवै सै

51जो कोए यो बिश्वास करै सै के यीशु मसीह सै, ओ पणमेसर की ऊलाद बण जावै सै अर जो कोए परम पिता तै प्रेम करै सै ओ उसकी ऊलाद तै भी प्रेम करैगा। 2इस ढाळ जिब हम पणमेसर नै प्रेम करां सां अर उसके आदेशां का पालन करां सां तो हम जाण लेवां सां के हम पणमेसर की ऊलादां तै प्रेम करां सां। 3उसके आदेश भोत घणे ओखे कोनी सैं। 4क्यूँके जो कोए पणमेसर की ऊलाद बण जावै सै, ओ जगत पै जीत पा लेवै सै अर संसार कै ऊप्पर म्हारै ताहीं जिसतै जीत मिली सै, ओ सै म्हारा बिश्वास। 5जो न्यू बिश्वास करै सै के यीशु पणमेसर का बेट्टा सै, ओए संसार पै जीत पावै सै।

पणमेसर का कहणा: अपणे बेट्टे के बारे म्ह

6ओ यीशु मसीह ए सै जो म्हारै धरै पाणी अर लहू के गेल्या आया। सिर्फ पाणी कै गेल्या नीं, बल्के पाणी अर लहू कै गेल्या। अर ओ आत्मा सै जो उसकी गवाही देवै सै क्यूँके आत्मा ए सत्य सै। 7गवाही देण आळे तीन सैं। 8आत्मा, पाणी अर लहू अर ये तीन्नु गवाहियां एक ए गवाही देके आप्पस म्ह सहमत सैं।

9जिब हम माणस कै जरिये दी गयी गवाही नै मान्नां सां तो

पणमेसर कै जरिये दी गयी गवाही तो और घणी कीमती सै। पणमेसर की गवाही का महत्व इसम्ह सै के अपने बेटे के बाबत म्ह गवाही उसनै दी सै। **10**ओ जो पणमेसर के बेटे म्ह बिश्वास राक्खै सै, ओ अपने भीतर उस गवाही नै राक्खै सै। पणमेसर नै जो कह्या सै, उस पै जो बिश्वास कोनी राख्दा, ओ पणमेसर तारी झूठा ठहरावै सै। क्यूँके उसनै उस गवाही का बिश्वास कोनी करया सै, जो पणमेसर नै अपने बेटे के बाबत म्ह दी सै। **11**अर वा गवाही या सै: पणमेसर नै म्हारे तारी अनंत जीवन दिया सै अर ओ जीवन उसके बेटे म्ह मिलै सै। **12**ओ जो उसके बेटे नै धारण करै सै, उस जीवन नै धारण करै सै। किन्तु जिसके धारे पणमेसर का बेटा कोनी सै, उसके धारे ओ जीवन भी नी सै।

इब अनंत जीवन म्हारा सै

13पणमेसर पै बिश्वास राक्खण आळयों, थारे तारी ये बात मैं इस करके लिक्खण लागरया सूँ जिसतै थम न्यू जाण ल्यो के अनंत जीवन थारे धारे सै। **14**म्हारा पणमेसर म्ह यो बिश्वास सै के जै हम उसकी इच्छा के मुताबिक उसतै बिनती करां तो ओ म्हारी सुणै सै **15**अर जब हम न्यू जाणां सां के ओ म्हारी सुणै सै चाहे हम उसतै कीमे भी माँगां तो हम न्यू भी जाणां सां के जो हमनै माँगा सै, ओ म्हारा हो चुक्या सै।

16जै कोए देखै सै के उसका भाई कोए इसा पाप करण लागरया सै जिसका फल अनंत मौत कोनी सै, तो उस तारी अपने भाई के खात्तर प्रार्थना करणी चाहिये। पणमेसर उस तारी जीवन देवैगा। मैं उनके खात्तर जीवन के बाबत म्ह बात करण लागरया सूँ, जो इसे पाप लागरे सैं, जो उन तारी अनंत मौत लग नीं पओचावैगा। इसा पाप भी होवै सै जिसका फल मौत सै। मैं थारे तै इसे पाप के बाबत म्ह बिनती करण नै कोनी कहण लागरया सूँ। **17**सारे भूँडे काम पाप सै। किन्तु इसा पाप भी होवै सै जो मौत की ओड़ कोनी ले जान्दा।

18हम जाणां सां के जो कोए पणमेसर का बेटा बण गया, ओ पाप कोनी करदा रहन्दा। बल्के पणमेसर का बेटा उसकी रुखाळी करदा रहवै सै। ओ दुष्ट उसका कीमे कोनी बिगाड़ पांदा। **19**हम जाणां सां के हम पणमेसर के सां। हालाके यो साबता संसार उस दुष्ट के बस म्ह सै। **20**किन्तु हमनै बेरा सै के पणमेसर का बेटा आ गया सै अर उसनै म्हारे तारी ओ ज्ञान दिया सै ताके हम उस पणमेसर नै जाण लेंवां जो सत्य सै। अर यो के हम उस्से म्ह स्थित सां, जो सत्य सै, क्यूँके हम उसके बेटे यीशु मसीह म्ह स्थित सां। परम पिता ए साच्चा पणमेसर सै अर ओए अनंत जीवन सै। **21**हे बाळकों, अपने आप नै झूठे देवतायां तै दूर राक्खो। 🌿

नोट्स
